

Ո Ր Ո Շ ՈՒ Մ

Ճանապարհային ոստիկանության վարչական իրավախախտման գործով 24.06.2021թ.
կայացված ԱՖ678106 որոշումն անփոփոխ, իսկ վարչական բողոքն առանց բավարարման
թողնելու մասին

<< 08 >> 07 2021թ. 7-13- 10661

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս,
վերանայելով Գոռ Խաչատրյանի ՄԴ/47424-21 դիմումի քննարկման արդյունքում ստեղծված
նյութերը՝

Պ Ա Ր Զ Ե Ց Ի

Երևան քաղաքի, Պուշկինի փողոցի, 37 շենքի, 12 բնակարանի բնակիչ Գոռ Խաչատրյանը
դիմումով խնդրել է բեկանել Ճանապարհային ոստիկանության վարչական իրավախախտման
գործով կայացված ԱՖ678106 որոշումը՝ նշելով, որ համաձայն չէ սթափության զննության
արդյունքների հետ, քանի որ ստուգումից որոշ ժամանակ անց մեկնել է ՀՀ Առողջապահության
նախարարության <<Կախվածությունների բուժման ազգային կենտրոն>> ՓԲԸ՝ սթափության
զննություն անցնելու նպատակով, որտեղ ստուգումից պարզվել է, որ գտնվում է սթափ վիճակում:
Դիմումին կից ներկայացրել է <<Կախվածությունների բուժման ազգային կենտրոն>> ՓԲԸ-ի
կողմից տրված վարորդի սթափության վիճակի զննության մասին արձանագրությունը:

Դիմումի քննարկման արդյունքում պարզվել է, որ վարչական իրավախախտման գործով
կայացված ԱՖ678106 որոշումը ենթակա է կատարման հետևյալ պատճառաբանությամբ:

Վարչական իրավախախտումների վերաբերյալ ՀՀ օրենսգրքի 126-րդ հոդվածի 1-ին մասի
համաձայն տրանսպորտային միջոցները ոչ սթափ վիճակում վարելը, եթե վարորդը միայն
ալկոհոլի ազդեցության տակ է, և զանցանքը չի պարունակում սույն հոդվածի երկրորդից
հինգերորդ մասերի հատկանիշները՝ առաջացնում է տուգանքի նշանակում՝ սահմանված
նվազագույն աշխատավարձի հարյուրհիսնապատիկի չափով: Նույն հոդվածի 9-րդ մասի
համաձայն՝ սույն օրենսգրքով նախատեսված դեպքում անձը համարվում է ոչ սթափ վիճակում
գտնվող, եթե ստուգմամբ պարզվում է, որ նրա մեկ լիտր արյան մեջ մաքուր ալկոհոլի
պարունակությունը 0.2 գրամից կամ մեկ լիտր արտաշնչած օդի մեջ 0.1 միլիգրամից ավելի է,
կամ եթե անձի արյան կամ մեզի մեջ առկա է թմրամիջոցի կամ հոգեմետ
(հոգեներգործուն) նյութի պարունակություն: Անձը համարվում է ոչ սթափ վիճակում գտնվող նաև
այն դեպքում, երբ նրա արյան կամ արտաշնչած օդի մեջ սույն մասում նշված չափով մաքուր
ալկոհոլի կամ արյան կամ մեզի մեջ թմրամիջոցի կամ հոգեմետ (հոգեներգործուն) նյութի
պարունակությունը ոստիկանության ծառայողի կողմից տրանսպորտային միջոցը
կանգնեցնելուց կամ այդ անձին առնչվող ճանապարհատրանսպորտային պատահարից հետո,
բայց մինչև նրա սթափության վիճակի զննություն անցկացնելը կամ սթափության վիճակի
զննություն անցնելուց նրան ազատելը, այդ անձի կողմից ալկոհոլային խմիչք, թմրամիջոց կամ
հոգեմետ (հոգեներգործուն) նյութ օգտագործելու հետևանք է:

Ուսումնասիրությամբ պարզվել է, որ 09.06.2021թ. ժամը 00:10-ի սահմաններում Գոռ
Խաչատրյանի մասնակցությամբ տեղի ունեցած ճանապարհատրանսպորտային պատահարից
հետո՝ ժամը 00:35-ին Ճանապարհային ոստիկանության ՃՊԾ 1-ին սպայական գումարտակի,
7-րդ սպայական դասակի տեսուչներ Ռ.Ղազազյանը և Մ.Դերիկյանը ստուգել են վթարի
մասնակից վարորդների սթափության վիճակը և պարզել, որ Գոռ Խաչատրյանի կողմից

արտաշնչած օդի մեջ ալկոհոլի պարունակությունը կազմել է 0,185 մգ/լ, այսինքն վարորդն ավտոմոբիլը վարել է՝ գտնվելով ոչ սթափ վիճակում:

Ճանապարհային ոստիկանության ծառայողների կողմից տրված պարզաբանման համաձայն՝ վթարի մասնակից վարորդների սթափության վիճակի գննությունը անցկացրել են <<Jupiter>> տեսակի թիվ 91100589 գործարանային համարի <<Ալկոտեստեր>> սարքով, որի արդյունքում պարզվել է, որ վարորդ Գոռ Խաչատրյանի 1լ արտաշնչած օդի մեջ ալկոհոլի պարունակությունը կազմել է 0.185 մգ/լ: Իրենց կողմից կազմվել է համապատասխան արձանագրություն, և վարորդը ծանոթանալով՝ ստորագրել է արձանագրության համապատասխան տողերում՝ նշելով իր անհամաձայնության մասին: Ոստիկանության ծառայողները նշել են, որ իրենց և վարորդի միջև ծառայողական բնույթի խոսակցություններից բացի այլ խոսակցություններ տեղի չեն ունեցել, ինչպես նաև ներկայացրել են <<Ալկոտեստեր>> սարքի ստուգաչափման մասին թիվ 043845 վկայականը, որն ուժի մեջ է 01.03.2021թ.-ից մինչև 01.03.2022թ.:

24.06.2021թ Ճանապարհային ոստիկանության ՃՊԾ 1-ին սպայական գումարտակի վարչական գործունեության բաժանմունքի պետ, ոստիկանության փոխգնդապետ Ա.Հովսեփյանի կողմից կայացվել է ԱՖ678106 որոշումը՝ Գոռ Խաչատրյանին Վարչական իրավախախտումների վերաբերյալ ՀՀ օրենսգրքի 126-րդ հոդվածի 1-ին մասով վարչական պատասխանատվության ենթարկելու մասին:

Դիմումին կից ներկայացված ՀՀ Առողջապահության նախարարության <<Կախվածությունների բուժման ազգային կենտրոն>> ՓԲԸ-ի կողմից տրված վարորդի սթափության վիճակի գննության մասին արձանագրությունը փաստում է, որ դիմումատուն սթափության գննության է ենթարկվել 09.06.2021թ. ժամը 01:56-ին, այսինքն ՃՈ ծառայողների կողմից սթափության գննություն անցկացնելուց մոտ 1 ժամ 21 րոպե հետո, ինչը չի հիմնավորում, որ նախնական ստուգման ընթացքում վարորդը գտնվել է սթափ վիճակում: Բացի այդ <<Jupiter>> տեսակի թիվ 91100589 գործարանային համարի <<Ալկոտեստեր>> սարքը ստուգաչափված է Հայաստանի Հանրապետության էկոնոմիկայի նախարարության <<Չափագիտության ազգային մարմին>> ՓԲԸ-ի կողմից և դրանով արձանագրված սթափության աստիճանը կասկած չի առաջացնում:

Այսպիսով, դիմումատուի արարքում առկա է Վարչական իրավախախտումների վերաբերյալ ՀՀ օրենսգրքի 126-րդ հոդվածի 1-ին մասով նախատեսված զանցակազմը, ուստի ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման գործով 24.06.2021թ. կայացված ԱՖ678106 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Գոռ Խաչատրյանին և Ճանապարհային ոստիկանության ՃՊԾ 1-ին սպայական գումարտակ:

